



Aqqalu C. Jerimiassen

UKA 2022/84

Atassut

08. november 2022

Kalaallit Nunaanni Danmarkimilu ilinniartoqarfiit peqqinnissamut tunngassutillit akunnerminni suleqatigiinnissamut isumaqatigiissusiornissaannut suliniuteqartoqassagaluarpat pitsaaqutit iluaqutissallu misissornissaannut suleqatigiissitamik pilersitsinissamut Naalakkersuisut peqquneqarnissaanik Inatsisartut aalajangiiffigisassaattut siunnersuut. Suleqatigiinnissamut isumaqatigiissut sumiiffinni nittartagaq aqqutigalugu ilinniakkanik qaffassarnerit pikkorissarnerillu atorneqarsinnaaneri qulakkiissavaat. Tamanna inuiaqatigiinni sumiiffiit ilaanni isumaginninnikkut peqqinnissatigullu immikkut ilisimasalinnik pisariaqartitsinermut naaperiaataassaaq. Suleqatigiissitap suliani UKA 2023-mi naammassisimassavaa.

(Inatsisartunut Ilaasortaq Anna Wangenheim, Demokraatit)

Siunnersuummi anguniangaasoq paasinarluinnarpoq. Nunatsinnimi ilinniartitaanikkut nalimmassaaqqittuarnissat, taamatuttaarlu peqqinnissaqarfitta iluani piginnaasatigut sulisoqarnerup iluani qaffassaaqataanissamut suliniuteqarnissat pisariaqartuusuaannarmata.

Uanili erserportaaq, Naalakkersuisut akissuteqaateqarnerminni erseqqissumik nassuiaateqarfigimmassuk, siunnersuummut attuumassuteqarluinnartumik suliamik saqqummiunneqartussaasumik oqariartormata.

Taamatuttaarlu Peqqinnissaq pillugu ataatsimiitsitaliarsuup sulinera maanna killiffia eqqarsaatigissagaanni, takoqqaarusunnarsinnaavoq qanoq maanna atorfissaqartinneqartut assigiinnigitsut inissisimanageri, peqqinnissaqarfitta iluani sulisoqarnikkut, ilinniartitaanikkut allatigullu.

Atassummiit iluatinnartuuttipparput qiviassallugu, maanna Ataatsimiitsitaliarsuup suliaqarnini ingerlatileruttoraq, naammasseriaruniuk sutigut politikikkut ataatsimoorussamik aqqiivigeqatigiinniarsinnaaneripput.

Tassanilu Atassummiittaaq, peqqinnissaqarfiup annertuumik ukkatarisarnera takornartaangereermat, Ataatsimiitsitaliarsuup tamakkiisumik saqqummiinissaa qilanaariinnarsinnaavarput.

Assiliaq ilivitsoq tassani takujumaarparput, suliffigissaanikkut, ilinniartitaanikkut, sullissinikkut allatigullu aqqiivigeqartigiiffiusinnaasut politikikkut qulaarsinnaalerumaaratsigit.

Naak siunnersuutip isumaa tunngaviatigut tapersernaraluartoq, Atassummiit naalakkersuisut innersuussinerat ilalerlugu, siunnersuut tapersinngilarput.